

Geiq Baez Doxdax Eu Fwen Ndeu

记一次山歌比赛

武鸣县锣圩镇英圩小学四年级 陆仕群

2015 nienz 4 nyied 20 hauh, gou camgya Daengx Yienh Daihsam Gaiq Sam Nyied Sam Hagseng Doxdax Eu Fwen, gou youh gikdoengh youh gaenjieng. Gaenjieng dwg aenvih gou caengz camgya gvaq daengx yienh doxdax eu fwen, lau eu mbouj ndei, ndigah mizdi gaenjieng. Hoeng, ndaej camgya cungj hozdung neix, mboujguenj eu ndaej ndei mbouj ndei, cungj ndaej lienh swheij, gou siengj daengz neix youh gig gikdoengh.

Eu fwen doxdax faen song ngoenz gawjhengz, ngoenz daih'it dwg cosaiq, ngoenz daihngaih dwg gietsaiq. Ngoenz daih'it eu ndaej ndei couh ndaej haeuj gietsaiq.

Ngoenz daih'it, youq giz hoihciengz doxdax eu fwen, vunz cien vunz fanh, miz senjsouj camgya doxdax, miz bingzvej lauxsae, miz bohme hagseng caeuq gyoengq doengzhag, lij miz hauj lai bouxlaux bouxcoz bouxsai mehmbwk daj gak dieg comz daeuj, gou gig vaiq couh yungz haeuj cungj heiq angqyangz neix bae.

Lajbyonghgoenz song diemj buenq cung, boux cujiz senhbu doxdax hainduj lo. Sien hawj haj boux hagseng eu sam hot fwen couxhek, gyoengqde eu ndaej gig ndei, laj daiz vunz lai bekwngz goksasa.

Ciepdwk couh doxdax eu fwen lo. Gyoengqde



miz mbanj eu ndaej gig ndei, fwen ndei sing gok ndeidingq raixcaix. Miz hot fwen ndeu gou geiq ndaej gig maenh: "Docih raeuz lauxsae, sim ndei baenz bohme, son sij cih son veh, gaeqmeh bienq funghvengz." Hoeng hix miz mbanj vunz eu ndaej mbouj ndei geijlai, mbeiiq, sing daemq, simvueng lumz swz. Lwnz daengz gou hwnj daiz eu fwen lo, ciuq lauxsae gaxgonq son gou haenx, gou daihdaih fuengfueng byaij hwnj gwnz daiz bae. Hoeng ndwn youq gwnz daiz, yawjraen lwgda bingzvej lauxsae

cimyawj gou, ndawsim gou roxnyinh gaenj lai lo, sim diuqbubbub, lumjbaenz cungj yaek diuq hwnj conghoz daeuj, angjfwngz hix miz hanh conh okdaej lo. Yaepyet lumz hot fwen gou yaek eu haenx lo. Seizneix, Banh lauxsae yawjraen gou dwg yienghneix gaenj, couh yaengx mehfwngz hwnjdaej, lwgda lumj cingq gangj: "Gaej lau, aeu doiq swheij miz saengsim, mwngz dwg boux lwnyez ak ndeu." Yawjraen lwgda unqswnh caeuq gujli lauxsae, aensim gou cugciemh dingh roengzdaej. Gou sup gaemz heiq raez ndeu, dawz song hot fwen eu sat, laj daiz yiengj hwnj sing bekwngz goksasa. Aenvih gou eu ndaej ndei, ndaej haeuj ngoenz daihngaih gietsaiq, gou sim-angq raixcaix, Banh lauxsae hix vih gou sim-angq. Geij ngoenz daej, gou lienh ciengq go lienh dwk hozhep bae, ngoenzneix ndaej yienghneix cingzicik, raemxhanh cungj suenq mbouj begbeg lae.

Baez doxdax eu fwen neix, yienznaeuz gou cij ndaej daihsam mingz, hoeng gou gig angq, aenvih gou daj ndaw gyoengq doengzhag wng biujyienh hag ndaej doxgaiq gig lai, gou itdingh hagsib gyoengqde, ndeindei bae hag Sawcuengh, baezlaeng gou biujyienh itdingh engq ndei.

(指导老师:班珠莲)

Siengjniemh Goengda

想念外公

德保县隆桑中心校 黄紫芸

Goengda gvaqseiq lo, gou gig siengjniemh de! Geij ngoenz neix aennaj riunyumj goengda cungj mbouj dingz yienh youq ndaw ukgyaeuj gou, hauj lai saeh gonq hix youq ndaw uk gou mbouj dingz yienh okdaej lo.

Aenvih daxmeh ndangnyieg bingh lai, gyahwnj gou caeuq dahcej doegsaw yungh cienz lai, ndaw ranz gwndaenj cungj gig hoj. Gou seiziq cungj muengh goengda daej ranz gou guhhek. Aenvih goengda daej le couh miz bingj gwn! Goengda moix baez daej cungj cawx daej doengz bingj ndeu, gou caeuq dahcej moix vunz gaem aen bingj ndeu humx youq henz ndang goengda, riz aenbingj riz bae riz dauq sij mbouj ndaej gwn saek amq. Daxmeh aeu bingj yo hwnjdaej, caj daengz dou biujyienh ndei seiz cij ciengj hawj dou aen ndeu, ndigah doengz bingj gwn ndaej hauj lai ngoenz! Miz seiz, gou bae caeg gwn gij bingj daxmeh yo haenx, ndawsim siengj: Caj gou aeu bingj gwn sat le, gou couh raen goengda lo.

Seiziq goengda daegbied ndiepgyaez gou caeuq dahcej, goengda baez daengz ranz gou, yawjraen gwnz ciengz nem rim gij ciengj dou, de cungj yawj bae yawj dauq, yienhndaej gig angq. Ndwencieng, goengda ceiq haisim lo, dou geij beixnuengx comz youq itheij, miz gangj miz riu, nauhyied raixcaix, goengda cij ndwn youq henz vuenyungz dwk yawj dou. Dou hix miz seiz andingh, haenx dwg goengda heuh dou haihoih, de naeuz: Sou aeu doxgiat, aeu doxbang, daeggo dahcej aeu guh yiengh ndei hawj daegnuengx dahnuengx yawj. Yienznaeuz ngamq geij coenz vah, hoeng hawj dou souh'ik gig lai.

Ngoenzneix, yienznaeuz goengda biek dou bae lo, hoeng de iteig lij lix youq ndawsim dou. Dou geiqniemh gij gyaez de! Geiqniemh gij najriu raeujrub de! Engq geiqmaenh gij dauhleix goengda son dou guh vunz haenx!

(指导老师:刘新旋)



Seizcin, ngoenz ndeu, doiq roeg-gacak ndeu daj giz gyae mbin daej ndaw ndoeng iq rog mbanj. Songde dajsuenq youq gizneix youq roengzdaej.

Noucim dingqny roeggacak heuh cici cetcet, yawjraen gyoengqde riengjret mbin bae mbin dauq, angq raixcaix, sim ngeix: "Baez neix gou dauqdaej miz ranznden lo, moix ngoenz cungj ndaej dingq gyoengqde ciengq go ndei dingq lo."

Roeggacak genj gofaex ceiq hung ceiq sang ndeu, youq nye faex ceiq sang haenx, hainduj caux rongz lo, gyoengqde dajsuenq seizhah couh youq gizneix faeg gyaeq ciengx lwg.

Noucim youq ndaw congh laj gofaex rox le, doeksaetyat, mbeihung dwk gvaqdaej lwnh roeggacak, gangj: "Go faex neix mbouj dwg giz ancienz ndeu ne, gij rag de yaek naeuh caez lo, seizlawz cungj yaek laemx roengzdaej, yungyiemj raixcaix, sou ceiq ndei gaej youq gizneix caux rongz."

Duz roeggacak ndeu naeuz: "Hw, caen gvaq lai lo! Roeggacak dwg conh-gyah caux rongz, dauq aeu dingq duz noucim ndeu gangj." Lingh duz roeggacak hix naeuz: "Mwngz ngoenz-naengz cungj ndoj ndaw congh, da nou feuzfed, rox gijmaz? Nanzdauh mwngz mbouj nyinh gij bonjsaeh roeggacak ma? Duz dairaq neix, dauq gamj daej guenj conghyah guh saehcingz!"

Roeggacak mbouj caeuq noucim caiq loso, de yawj mbouj hwnj noucim, engq mbouj saengq noucim gangj. Gyoengqde sikhaek doenghfwngz caux rongz, ngoenz aenrongz guh baenz haenx couh sikhaek buen haeujbae youq lo.

Nyaengq ndaej mboengq ndeu, yienghyienh cungj swnh, roeggacak byoeng lwg lo, duzdaz cungj dwgyaez raixcaix, daengx ranz gvaq gij saedcej gig vuenyungz.

Hoeng, miz ngoenz ndeu, daeng-ngoenz ngamq swng hwnjdaej, roeggacak ciuq ngoenznaengz ityiengh, angqvauvau bae ra gwn, songde cingq

Vahgienq Noucim

鼯鼠的劝告



daiq gijgwn mbin dauqma. Seizneix, gyoengqde yawjraen gofaex aenrongz swheij youq haenx gaenq laemx roengz lo, aenrongz deng dimz vaih lo, roeglwg cungj dai liux lo.

Roeggacak simcieg dangqmaz, gyoengqde ra raen noucim, daejsubsub gangj: "Camj lai lo! Dou mbouj dingq vah mwngz, deng fad naek lo. Dou mbouj siengj daengz gij vah mwngz dwg baenzneix deng."

Noucim han naeuz: "Aenvih sou yawj mbouj hwnj gou. Sou hix mbouj siengjsiengj, gou youq laj dei, depgyawj rag gofaex, rag gofaex ndei roxnaeuz naeuh, gou ceiq cingcuj lo."

Roeggacak caiq hix mbouj gamj yawj mbouj hwnj duz noucim iqet youq lajdeih lo. Songde cam noucim go faex lawz goek laeg youh maenh, youh youq gwnz go faex sang ndeu caux rongz lo. Roeggacak caeuq noucim doxbang doxingq, baenz baengzyoux ndei lo.

(Ganh Sozvwngz/甘说文 bienhoiz)